

## WOH HUSN HAI

Woh husn hai Aye Sayyid e Abraar Tumhara  
Allah bhi hai Taalib e Deedaar Tumhara

Mehboob ho tum khaalik e kul Maalik e kul ke  
Kyuñ khalq pe qabza na ho Sarkaar Tumhara

Allah ne banaaya tumheñ kaunain ka Haakim  
Aur rakha laqab Ahmed e Mukhtaar Tumhara

Bigde huwe sab kaam sañwar jaayēñ usi dum  
Dil se koi gar naam ley ek baar Tumhara

Dil meññ nahiñ kuchh is ke siwa aur tamanna  
Allah dikha de hameññ Darbaar Tumhara

Har dum hai tumheññ apne gulaamoñ pe inaayat  
Din raat ka ye kaar hai Sarkaar Tumhara

Be Maañge ataa karte haiññ man maani muraadeññ  
Dena hi gulaamoñ ko hai kirdaar Tumhara

Allah ne waada ye kiya hai Shab e Me'araaj  
Dozakh meññ rahega na Gunahgaar Tumhara

Kyun Aasiyo! gam se hai dil afgaar tumhara  
Gamkhwaar tumhara hai wo dildaar Tumhara

Lo aaya wo haami wo madadgaar Tumhara  
Beda huwa aye Ahle Sunan Paar Tumhara

Aye Aasiyo! Tum apne gunaahoñ se ye keh do  
Sarkaar e Madina hai Khareedaar Tumhara

Ghabraaye gunahgaar to rehmat ne pukaara  
Aye Aasiyo! aa pahuncha madadgaar Tumhara

Duniya mein qayaamat mein sar e pul pe lahed mein  
Daaman na chhute haath se Sarkaar Tumhara

A'ada ko jalaane ke liye naar e hasad mein  
Hum zikr kiye jaayenge Sarkaar Tumhara

Tauheed pe marte hain magar is se hain gaafil  
Allah ka inkaar hai inkaar Tumhara

Tauheen ko Tauheed samajhte hain wahaabi  
Samjhe inhein Rab Waahid e Qahhaar Tumhara

Bulbul hai **JAMEEL E RAZVI** aye gul e wehdat  
Mil jaaye ise rehne ko gulzaar tumhara

### KHUDA KE FAZL SE

Khuda ke fazl se hum par hai saaya Gaus e Aazam ka  
Hamein dono jahaan mein hai Sahara Gaus e Aazam ka

*Muridi La Takhaf* keh kar Tasalli di gulamon ko  
Qayamat tak rahe be khauf Banda Gaus e Aazam ka

Jo apne ko kahe mera mureedon mein wo daakhil hai  
Ye farmaaya huwa hai mere Aaq Gaus e Aazam ka

Hamaari laaj kis ke haath hai Baghdaad waale ke  
Museebat taal dena kaam kiska Gaus e Aazam ka

Gaye ek waqt mein satta mureedon ke yahaan aqa  
Samajh mein aa nahi sakta mu-amma Gaus e Aazam ka

Bulaa kar kaafiron ko dete hain Abdaal ka rutba  
Hamesha josh par rehta hai dariya Gaus e Aazam ka

Salaateene Jahaan kyun kar na un ke Ro'ab se kaañpein  
na laaya sher ko khatre mein kutta Gaus e Aazam ka

Huwi ek dev se ladki riha us naam lewaa ki  
Padha jungle mein jab us ne wazeefa Gaus e Aazam ka

Wo kehkar *qum bi izzillaah* jila dete hain murdon ko  
Bahut mashhoor hai ehya e mauta Gaus e Aazam ka

Farishte madrase tak saath pahuñchaane ko jaate the  
Ye darbaar e Ilaahi mein hai rutba Gaus e Aazam ka

Jo farmaaya ke doshe Auliya par hai qadam mera  
Liya sar ko jhuka kar sab ne talwa Gaus e Aazam ka

Dum e farmaa khuraasaan mein Moinuddeen Chishti ne  
Jhuka kar sar liya aañkhoñ pe talwa Gaus e Aazam ka

Agar che murg sab ke bol kar khaamosh hote hain  
Magar haan! murg bolegha hamesha Gaus e Aazam ka

Rahe paaband e Ahkaam e Shari'at Ibteda hi se  
Na chhoota sheer khwaari mein bhi roza Gaus e Aazam ka

Mohammed ka Rasoolon mein hai jaise martaba A'ala  
Hai Afzal Auliya mein yun hi Rutba Gaus e Aazam ka

Ata ki hai bulandi Haq ne Ahlullaah ke jhandon ko  
Magar sab se kiya ooncha pharera Gaus e Aazam ka

Rihaayi mil gayi us ko azaab e qabr o mehshar se  
Yahaan par mil gaya jisko sahara Gaus e Aazam ka

Lahed mein jab farishte mujh se poochheñge to keh doonga  
Tareeqa Qaadri hoon naam lewa Gaus e Aazam ka

Farishto! rokthe kyun ho mujhe jannat mein jaane se  
Ye dekho haath mein daaman hai kis ka Gaus e Aazam ka

Janaab e Gaus Dulha aur baraati Auliya honge  
Mazaa dikhlayega mehshar mein sehra Gaus e Aazam ka

Meri phooti huwi taqdeer ki qismat chamak jaaye  
Banaaye mujh ko apna sag jo Kutta Gaus e Aazam ka

Sadaaye soor sunkar qabr se uth-te hi poochhuñga  
Ke batlaao kidhar hai Aastaana Gaus e Aazam ka

Nabi Noor e Ilaahi aur ye Noor e Mustafaai haiñ  
To phir Noori na ho kyuñ kar gharaanaa Gaus e Aazam ka

Rasoolullah ka dushman hai Gaus e Paak ka dushman  
Rasoolullah ka pyaara hai pyaara Gaus e Aazam ka

Mukhaalif kya karey mera ke hai behad karam mujh par  
Khuda ka Rehmatul Lil Aalameeñ ka Gaus e Aazam ka

**JAMIL E QAADRI** Sau Jaañ se ho qurbaan Murshid par  
Banaaya jis ne tujh jaise ko bandaa Gaus e Aazam ka

### **AAÑKHOÑ KA TAARA NAAM-E-MUHAMMAD e**

Aañoñ ka taara Naam-e-Muhammad e  
Dil ka ujaala Naam-e-Muhammad e

Allaahu Akbar Rabbul Ulaa ne  
Har shay pe likha Naam-e-Muhammad e

Daulat jo chaaho donoñ jahaan ki  
Kar lo wazeefa Naam-e-Muhammad e

Paayeñ muraadeñ donoñ jahaan mein  
Jis ne pukaara Naam-e-Muhammad e

Rakho lahed mein jis dum azeezo  
Mujh ko sunaana Naam-e-Muhammad e

Padhti duroodeñ daudeñgi hooreñ  
Laasha jo lega Naam-e-Muhammad e

Roz e Qiyaamat meezaan o pul par  
Dega Sahaara Naam-e-Muhammad e

Poochhega Maula laaya hai kya kya  
Maiñ ye kahoonga Naam-e-Muhammad e

Gam ki ghataayeñ chhaai haiñ sar par  
Kar de Ishaara Naam-e-Muhammad e

Ranj o alam mein haiñ naam lewa  
Kar de Ishaara Naam-e-Muhammad e

Bedaa tabaahi mein aa gaya hai  
De de sahaara Naam-e-Muhammad e

Zakhmi jigar par majrooh dil par  
Marham lagaa jaa Naam-e-Muhammad e

Dil mein adaawat khar ke bhari hai  
Najdi na lega Naam-e-Muhammad e

Apne **RAZA** ke Qurbaan jaoon  
Jis ne sikhaaya Naam-e-Muhammad e

Aañoñ mein aakar dil mein samaakar  
Rangat rachaa jaa Naam-e-Muhammad e

Apne **JAMEEL E RAZVI** ke dil mein  
Aaja samaa jaa Naam-e-Muhammad e

### **JAAN O DIL SE TUM PE MERI JAAN QURBAAÑ GAUS E PAAK**

Jaan o dil se tum pe meri jaan Qurbaañ Gaus e Paak  
Hai Salaamat tum se mera deeno Imaan Gaus e Paak

Maiñ tera adna bhikaari tu mera sulnaan hai  
Hai qasam Haq ki ye mera deeno Imaan Gaus e Paak

Aap ki chashme karam ka ek ishaara ho agar  
Do jahaan ki mushkileñ ho jaayeñ aasaan Gaus e Paak

Aap ka Naam-e-Muqaddas mere dil par naqsh hai  
Meri Bakhshish ke liye kaafi hai saamañ Gaus e Paak

Meri aankheñ tera gumbad teri chaukhat mera sar  
Mera laasha aur ho tera biyabaañ Gaus e Paak

Bheja tune hi Moinuddin Chishti ko yahañ  
Hind mein tere sabab se haiñ Musalmañ Gaus e Paak

Lut raha hai qaafila Baghdaad waale le khabar  
Al madad Mehboob e Subhañ Shaahe Jeelañ Gaus e Paak

Hai kidhar aa dekh to bandoñ ki kya haalat huwi  
Aye mere Baghdaad waale Shaahe Jeelañ Gaus e Paak

Zaalimoñ ne zulm se bandoñ ko kar daala halaak  
Al madad Baghdaad waale Shaahe Jeelañ Gaus e Paak

Laaj waale Sunniyoñ ki laaj tere haath hai  
Qaadiri Manzil ke doolha Shaahe Jeelañ Gaus e Paak

Ho Raza par lutf tera hum par un ka lutf ho  
Un ka daamañ hum pe un par tera daamañ Gaus e Paak

Kijiye Imdaad, Izzat do jahañ ki dijiye  
Hai **JAMEEL E QAADRI** adna sanaa khwañ Gaus e Paak

### **AYE SHAHENSHAAHE MADINA ASSALAATU WASSALAAM**

Aye Shahenshaahe Madina Assalaatu Wassalaam  
Zeenat e Arshe Mu'alla Assalaatu Wassalaam

Rabbi Hablee Ummati kehte huwe paida huwe  
Haq ne farmaaya ke bakhsha Assalaatu Wassalaam

Momino! padhte nahiñ kyuñ apne aaqa par durood  
Hai Farishtoñ ka wazeefa Assalaatu Wassalaam

Buth shikan aaya ye kehkar sar nigooñ buth ho gaye  
Jhoom kar kehta tha Ka'aba Assalaatu Wassalaam

Sar jhuka kar baa adab Ishq e Rasoolullaah mein  
Keh raha tha har sitaara Assalaatu Wassalaam

Gunche chatke phool mehke chehchahaayiñ bulbuleiñ  
Gul khila baage Ahad ka Assalaatu Wassalaam

Maiñ wo sunni hooñ **JAMEEL E QAADRI** Marne ke baad  
Mera laasha bhi kahega Assalaatu Wassalaam

### **NAHI MERE ACHHE AMAL GAUSUL AAZAM**

Nahi mere achhe amal Gausul Aazam  
Magar tumpe rakhta hooñ bal Gausul Aazam

Jo duniya mein hoga Madad khwaah un se  
Sambhaalenge kal us ki kul Gausul Aazam

Khilaade kali dil ki maiñ tere sadqe  
Pareshaan hooñ aaj kal Gausul Aazam

Haiñ Mushkil kusha Jadde Amjad Tumhare  
Karo mere uqdoñ ka hal Gausul Aazam

Tamanna hai dil mein ke Baghdaad pahunchuñ  
Wahiñ mujh ko aaye ajal Gausul Aazam

**JAMEEL** aarzu hai ke mujh ko bulaakar  
Suneñ mujh se khud ye gazal Gausul Aazam

### **AHMED MUKHTAAR AATE HAIÑ**

Ye wo mehfil hai jis mein Ahmed e Mukhtar aate haiñ  
Malaaike leke rehmat ke yahañ anwaar aate haiñ

Ziyaarat ke liye ban kar malak zawwaar aate haiñ  
Nabi ko dekhne yaañ Taalib e deedaar aate haiñ

Gulaamaane Shahe deen bazm mein yuñ aate haiñ jaise  
Bhikaari bheek lene barsare darbaar aate haiñ

Munaafiq jaante haiñ shirk gar is bazme aqdas ko  
To khud kyuñ shirk karne ke liye makkaar aate haiñ

Mukhaalif be adab is zikr ki rif'at ko kya samjhe  
Yahañ par sar ke bal ahle sunan deendaar aate haiñ

Ye un ke sabz gumbad par bakhatt-e-noor likha hai  
Wo achchhe ho ke jaate haiñ jo yaañ beemaar aate haiñ

Uthega shor mehshar mein na ghabraao gunahgaaro!  
Wo dekho Shaah khole gesu e khamdaar aate haiñ

Kharideinge jo rehmat ke ewaz ambaar isyaañ ke  
Kharidaare gunaah ab barsare baazaar aate haiñ

Jo kehte haiñ museebat mein "*Agisni Ya Rasoolallaah*"  
Madad karne ko un ki Sayyid e Abraar aate haiñ

Khudaawanda Dumey Aakhir ye Izraail farmaayeiñ  
**JAMEEL E QAADRI** hoshyaar ho Sarkaar aate haiñ

### YA RASOOLALLAAH AAKAR DEKH LO

Ya Rasoolallaah aakar dekh lo  
Ya Madine mein bulaakar dekh lo

Saikdon ke dil munawwar kar diye  
Is taraf bhi aañkh uthaakar dekh lo

Kalma padhte ji utheñ murde abhi  
Jaan e Isa lab hilaakar dekh lo

Chhede jaate haiñ humein munkar nakeer  
Gor mein tashreef laakar dekh lo

Ye kabhi inkaar karte hi nahiñ  
Be nawaaao aazmaa kar dekh lo

Chaahe jo maango ataa farmaayenge  
Na muraado haath uthaakar dekh lo

Sair e Jannat dekhna chaaho agar  
Rauza e Anwar pe aakar dekh lo

Do jahaan ki sarfaraazi ho naseeb  
Un ke aage sar jhuka kar dekh lo

Is **JAMEEL E QAADRI** ko bhi Huzoor  
Apne dar ka sag banaakar dekh lo

### TUMHIÑ NE TO KIYA HUM KO MUSALMAAÑ

Tumhiñ ne to kiya hum ko musalmaañ Ya Rasoolallaah e  
Tumhiñ to ho hamaara deen o Imaan Ya Rasoolallaah e

Na bhoole aur na bhoologe qiyaamat tak gulaamon ko  
Na kyuñ hoñ ahlesunnat tum pe qurbaañ Ya Rasoolallaah e

Liwa ul hamd ke neeche bane Maula qiyaamat mein  
Mera har raungta tera sana khwaañ Ya Rasoolallaah e

Tere husn o Malaahat par do aalam kyuñ na hoñ Qurbaañ  
Khuda e Paak hai jab tera khwaahaañ Ya Rasoolallaah e

Makaano la makaan hoor o malak arsh o falak kursi  
Tumhaare hi liye ye sab haiñ saamaan Ya Rasoolallaah e

Salaateen e zamaana aastaañ par sar ragarte haiñ  
Tumhaari khaak e dar hai Taaj e Shaahaañ Ya Rasoolallaah e

Maiñ ek adna bhikaari Aap Sultaane zamaana haiñ  
Sulemaañ Aap maiñ mor e Sulemaañ Ya Rasoolallaah e

Banaaya hai Khuda ne dono Aalam ka tujhe Haakim  
Saron par lete haiñ sab tera farmaan Ya Rasoolallaah e

Khuda ke baad afzal jaan-na tum ko do Aalam se  
Yahi to hai hamaara deen o Imaan Ya Rasoolallaah e

Gulaamoñ ki har ek mushkil mein tum imdaad karte ho  
Meri bhi mushkilein ho jaayein aasaan Ya Rasoolallaah e

**JAMEEL E QAADRI** ki do jahaan mein laaj rakh lena  
Tufail e Hazrat e Ahmed Raza Khaan Ya Rasoolallaah e

### KAR LO MAQBOOL YA RASOOLALLAAH

Kar lo Maqbool Ya Rasoolallaah e  
Ye meri iltija Rasoolallaah e

Bani e majlis e mubarak ko  
Dejiye behtar silaa Rasoolallaah e

Jitne Sunni Shareek e Majlis haiñ  
Sab pe kar do ataa Rasoolallaah e

Aap ke aastaan ke bande haiñ  
Bakhsh do har khataa Rasoolallaah e

Har Museebat mein kijiye imdaad  
Jab pukarein ke Ya Rasoolallaah e

Us ki fauran muraad bar aayi  
Jis ne dil se kaha Rasoolallaah e

Qabr mein hashr o nashr o meezaan mein  
Har alam se bacha Rasoolallaah e

Khuld mein apne saath le lena  
Apne bandoñ ko Ya Rasoolallaah e

Peer o murshid mere Janaab e Raza  
Un pe saaya tera Rasoolallaah e

Un ki Aulaad sab phale phool  
Hashr tak daaima Rasoolallaah e

Haamid o Mustafa Raza ke phool  
Mehkein taa hashr Ya Rasoolallaah e

Unke aa'ada pe rakh unhein gaalib  
Aur izzat badhaa Rasoolallaah e

Nechri Kaandhwi Wahabi se  
Sunnioñ ko bachaa Rasoolallaah e

Jo ke Gangohi ki karey tareef  
Us ko andha uthaa Rasoolallaah e

Thaanvi ko jo peshwa jaane  
Us ko neecha dikhaa Rasoolallaah e

Qadiyani ko jo kahe momin  
Bhej us par balaa Rasoolallaah e

In Khabeesoñ ko jo kahe kaafir  
Us pe Fazl e Khuda Rasoolallaah e

In Shayateen pe jo kare laanat  
Us pe Rehm e Khuda Rasoolallaah e

Har jagah mere waaldain pe ho  
Rehm o fazl Aap ka Rasoolallaah e

Mere ahl o eyaal par rehmat  
Aap ki daaima Rasoolallaah e

Mere ahbaab par bhi fazl rahe  
Har ghadi Aap ka Rasoolallaah e

Gaus e Aazam ka waasta ho qubool  
Meri har iltija Rasoolallaah e

Apne bande **JAMEEL E RAZVI** ko  
Khaas banda banaa Rasoolallaah e

### **AHMED RAZA KHAÑ QAADRI**

Aabru e Mominaañ Ahmed Raza Khañ Qaadri  
Rehnuma e Gumrahaañ Ahmed Raza Khañ Qaadri

Ilm mein behr e rawaāñ Ahmed Raza Khañ Qaadri  
Deen mein gauhar fishaāñ Ahmed Raza Khañ Qaadri

Ilm ke haiñ Gulsitaāñ Ahmed Raza Khañ Qaadri  
Baag e Deen ke gulfishaāñ Ahmed Raza Khañ Qaadri

Chashme Imaāñ se agar dekho to haiñ Imaāñ ki jaañ  
Jaane Jaañ Roohe rawaāñ Ahmed Raza Khañ Qaadri

Tera ilm o fazl o shaan o shaukat o jaah o hasham  
Shash jehat par hai ayaañ Ahmed Raza Khañ Qaadri

Hai Arab ke aalimoñ ka madh khwaāñ saaraa jahañ  
Aur wo tere madh khwaāñ Ahmed Raza Khañ Qaadri

Tum se gulzaar e shari'at mein khile khush rang phool  
Baage deen mein gul fishaāñ Ahmed Raza Khañ Qaadri

Deen ka dushman ho ya ho dost sab ke waaste  
Hai teri haq go zubaāñ Ahmed Raza Khañ Qaadri

Haq Ta'ala ne kiye be had kamaalaato uloom  
Tere seene mein nihaāñ Ahmed Raza Khañ Qaadri

Ahlesunnat ke saroñ par daaima rakkhe Khuda  
Tujh ko baa amn o amaañ Ahmed Raza Khañ Qaadri

Aalimaan e Makka wo Taiba ne li tujh se sanad  
Haiñ wo tere qadr daāñ Ahmed Raza Khañ Qaadri

Kya sataa sakte haiñ tujhko tere aa'ada murshida  
Haq hai tujh par maherbaañ Ahmed Raza Khañ Qaadri

Pad gayaa hai pusht par a'ada ki ab kya jaayega  
Tere kode ka nishaañ Ahmed Raza Khañ Qaadri

Cheer kar bad mazhaboñ ke dil mein guzri waar paar  
Tere neze ki sinaāñ Ahmed Raza Khañ Qaadri

Aa chuki thi shaikh e najdi ke beyabaañ mein bahaar  
Bhej di tune khizaāñ Ahmed Raza Khañ Qaadri

Fateh di Haq ne tujhe a'ada e deen par daaima  
Tujh pe hai Haq meharbaāñ Ahmed Raza Khañ Qaadri

Haq isey kehte haiñ dekho rad na koi kar sakaa  
Tera fatwa e Azaañ Ahmed Raza Khañ Qaadri

Khaandaane Paak e Barkaatia ka chashm o charaag  
Kehte the Noori Miyaañ Ahmed Raza Khañ Qaadri

Muhiye Sunnat aur Mujaddid is sadi ke aap haiñ  
Aye Imam e Muftiyaañ Ahmed Raza Khañ Qaadri

Yaad rakhein ge qiyaamat tak Gulaamaane Rasool  
Tere Jalsoñ ka Samaāñ Ahmed Raza Khañ Qaadri

Aye mere Achhe ke Achhe mujh ko bhi achchhaa banaa  
Sadqa e Achhe Miyaañ Ahmed Raza Khañ Qaadri

Sadqa e Sarkaar e Jilaani phalein phulein Mudaam  
Mustafa, Haamid Miyaañ Ahmed Raza Khañ Qaadri

De Mubaarak baad un ko Qaadri Razvi **JAMEEL**  
Jin ke Murshid haiñ Miyaañ Ahmed Raza Khañ Qaadri



## TABEE'AT AAJ KYUÑ AISI RASAA HAI

Tabee'at Aaj kyuñ aisi rasaa hai  
Ke Khud apni zabaañ par Marhaba hai

Sabaa kyuñ is qadar itra rahi hai  
Chaman mein kaun sa guncha khila hai

Anaadil gaa rahe haiñ kyuñ taraane  
Ye kaisa shaad har shaah o gadaa hai

Ye kaise Shaadiyaane baj rahe haiñ  
Ye kyuñ baabe Masarrat aaj waa hai

Baraati haiñ Tamaami Ahlesunnat  
Raza e Qaadri Doolha banaa hai

Taraane gaa rahi haiñ Qumriyaañ Aaj  
Ke Abdul Mustafa Doolha banaa hai

Bareilly ka naseeba jagmagaaya  
Ke Abdul Mustafa Doolha banaa hai

Baraati aa rahe haiñ wajd karte  
Ke Abdul Mustafa Doolha banaa hai

Ye dekho Sadqa e Siddeeq e Akbar  
Ke Abdul Mustafa Doolha banaa hai

Ye hai Farooq e Aazam ki Karaamat  
Ke Abdul Mustafa Doolha banaa hai

Karam Usmaan Zunnurain ka hai  
Ke Abdul Mustafa Doolha banaa hai

Sakhaawat hai Ali e Murtaza ki  
Ke Abdul Mustafa Doolha banaa hai

Ghataa Baghdaad se uthi karam ki  
Ke Abdul Mustafa Doolha banaa hai

Ye hai Baghdaad waale ka tasarruf  
Ke Abdul Mustafa Doolha banaa hai

Mubaarak Ahlesunnat ko Mubaarak  
Raza e Qaadri Doolha banaa hai

Kaheñ kyuñ kar na achhe tujh ko achha  
Huzoor Achhe ka tu achha huwa hai

Bhikaari aa rahe haiñ Bheek lene  
Raza ke dar se baada bat raha hai

Jaleñ A'ada e deen Naar e Hasad mein  
Ke Yuñhiñ un ki qismat mein likha hai

Raza kyuñ kar na ho a'ada pe gaalib  
Ke wo to Naaib e Sher e Khuda hai

Munaafiq hai 'Adu is Aastaañ ka  
Jo Sunni hai wo is dar ka gadaa hai

*Bi Hamdillah* Khushboo e Raza se  
Dimaag e Ahlesunnat bas rahaa hai

Phale In ka Ilaahi! Baag e Aulaad  
Ye har Sunni ke lab par Iltija hai

**JAMEEL E QAADRI** *Alhamdu Lillaah*  
Ke Tu is Aastane ka gadaa hai



